

Pablodenipa Corintodenidsa ima teppe dsotodecca dosse quinajaro 2 Corintios

Pablopa tahide odsa panani Corintohuaji toccapohuipa nahidsa huajano pamaha madijari. Dsotode naco nahihuaji Jesocristodsa toquejenajarideni qquide toccapomajari. Pohuadenidsa ima teppe dsodode naco dissera tajari, Dio Pohua jipa tahicca tocatterahijine.

Pocca ima teppe tahideccadsa: 1 Corintodenidsa, inajaro. Dsotode pocca ima teppe pohuadenidsa dsodo inapomajaro. Naraha najaro ima teppepi iadsa tojajerani. Amossi nani. Najaro nattini ima teppe onihi dsodo inapomajaropi ajijaro. Ajaropi dsotodemaniccaraha ajarods: Corintodenidsa ima teppe dsotodecca, inajaro.

Ajijaro ima teppepi Pablo pohuadsa tojiperamanajari quinahi mittadsa pohuadenidsa dsodo inapomajaro. Aja pohuadeni quequeriquimana nahihuaji maidsehe maridedeni jai tojedsimajari. —Pablopa Diocca dosseniji jarahi, pocca marinaja timittamana-jeraji —quinadsapa Pablods tojiperamanajari.

Nadsapa Pablo pohuadsa Dio pajissa huahua najaricca ima, Jesocristo tahimari mari mari najarijine ocasserani ahuaridsajaricca ima dsodo inajaro. Pohuadenidsa huati huana tadsa pocca marinaja bicani onihi onihi dsodo inajaro.

Pablo, Timoteo tedseje nija quinajari

¹ ¿Nija, ohuemecotedeni? Ohuapi Pablo. Tiadenidsa dsodo onajaro. Dio jipa tadsa Jesocristocca dodosse ojararo. Ohuemecote Timoteo tedseje tiadenidsa: —¿Nija, bicacquiri tiquinaqui? —inajaro. Ajijaro imapi nani dsama arobeni Acaiacca odsa panani Corintohuajicca Dio Attidsa titiqueriquimana najarodenidsa dsodo inajaro. Najaro ticcadeni dsama arobenidsa Jesocristodsa jehe quinajari madiridsamanajaridenidsa naqui dsodo inajaro. ² Icca Abi Dio, Pohua Bedi ia Medsede Jesocristo tedseje tiadenidsa ima bicani inanamana-dsanapona, inajaro. Poccadeni jonehe naqui tibodidenidsa tojadsanapona, inajaro.

Diopa ia acco tocamabaqqui tahi

³ Ia Medsede Jesocristocca Abi Diodsa etidsena. Pohuapa icca Abi iadsa huati cahanari canahi. Huajijiradsa ia acco acco tocamabaqqui najari. ⁴ Ocasserehe onihi, onihi iadsa ssonaridsapi Dio ibodi acco camajari. Nadsapi imecotedeni ocasserani ahuamanadsa naco acco icamabaqquihijine ipajirani. Pina Dio ia acco tocamabaqquijarissa najaro imecotedeni acco icamabaqquijari. ⁵ Jesocristopa ocasserehe huapi tehe inahanajaro. Nadsapi ia naqui pina Cristo pohua ocasserani ahujarissa inajaro. Ocasserehe inahanani huapi taraha Jesocristocca iquejenajarojine Diocca acco camehe iadsa jiquejerani. ⁶ Aji ia ocasserehe inahanajaropi ponima jerani. Tibodideni acco icamabaqquinijine, tossiejehe ticajimananijine ocasserehe ihinahana najarode. Dio ibodi acco camadsapa ia naqui tibodideni acco icamabaqquijaro. Nema nadsapi ocasserehe pina iadsa ssonarijarossa najaro tiadenidsa ssonaridsapi mohuaradsa tinahanamananijine tipajiramananitohui. ⁷ Nadsama ocasserehe tinahanamanajaro pina ocasserehe inahanajarossa nadsapi Dio

tiadeni acco tocamabaqquihitohui. Pina ia acco tocamabaqquijarissa nahitohui. Najaro pajissa tojanijine nahatoto inajaro.

⁸ Imecotedeni, dsama Asiahuaji jaijadsa ocasserani imeni inahanajarocca ima nahatoqquri tiquinanijine tiadenidsa dsodo onajaro. Najidsohue oppinabote iadsa ssonaridsapi ipamajonabote nade. Iadsa tocasserani nadsapi: —Nidsa ajijaro najidsohue jicadsapi imadipomantohui —inejerade. ⁹ Ibodidsa: —Pajissa ipamajonantohui —inade. Naraha ipamajonanjine Dio ecossadsapi imadiccajaro. Nadsapi najaro oppinehejine iadsa ahurato tajaro: Madija iapi ia inassijanjine ipajira-jerani. Diona nahato tahi ojari najari. Puhuapa huatiajarideni nahatonide. ¹⁰ Puhuapa dsoqqehe oppinabotedsa ia dsori tonanabaqquijari. Puhuadsa pajissa inadsapi nidsa dsotode paji idsoqquerinicca najidsohuedsa naco ia dsori tonanabaqquihitohui. Nadsapi etti: —Jehe, ia dsori tonanabaqqui-dsanapohitohui —ihinanajaro. ¹¹ Tiadeni naqui ia acco ticamabaqquimananjine Diodsa huati huati tiquinaji. Diodsa huatide huapi tadsapa Puhuadsa huatidsemanahi naco huapi tahitohui. Diopa ima bicani iadsa inananicca ima imecotedeni mittamanadsapa Puhuadsa: —Epejeni, tijine bica tani —quinahitohui.

Pablopa Corintohuaji toccani-jarajaricca ima

¹² Ohuemecotedeni, tiadenidsa imadidsapi imadinissa tade. Najarodsa etidsejaro. Ima icappirehe imadijaro. Etti naqui maidsehe jirehe huati huati inajaro. Madija huapimadsa naqui bicaqquri inadsa nema inaridsajaro. Naraha icca madie bica tajaropi ibodi nahato tajarojine jerani. Dio iadsa huati huana tadsa ia acco tocamabaqquijarijinena imadinissa tajaropaji. ¹³⁻¹⁴ Occa ima teppe tiadenidsa dsodo onajaropi ima najo tanicca dsodo

dsodo onejerani. Ima najora taniccadsa dsodo dsodo onajaro. Aji occa ima teppe timittamananissa tanijine jipa onaraha jidapana motara timittamanajaro. Nidsa dsotodena timittamananissa tanitohui. Nidsa ia Medsede Jesocristo ccanipomahicca huada bacco tadsa tiadenipi iadsa tetidsemananitohui. Pina jidapana ia tiadenidsa etidsejarossa tiquinanitohui.

¹⁵ Iadsa tetidsemananijine nahato onadsapi tahide tiadeni qquide occapona, onade. Nema onadsa tiadeni qquide occani pamadsapi ima bicani naqui tiadenidsa onanani pamanijine. ¹⁶ Obodi huatodsapi ajima onade: Dsama Masedoniahuaji occadsapi nani tiadenidsa onajocana. Dsotodena Masedoniahuaji occa, omadi, occanipomadsapi tiadenidsa onajopomaccanijine, onajarode. Dsotode occa benehijine ohua acco ticamamanadsapi dsama Jodeahuaji occaninijine, onade. ¹⁷ Naraha tiadeni qquide occapoma-geradsa joma onadsapi ohuadsa: —A ¿Pablopa bodi huatohuissa tajarajarico? —tiquinejeraji. Ohuapi pajissa tiadeni qquide tohuini onadsapi occana, onade. Aja madija ohuahapa: —Jehe, ajima onanana —naraha huada onihidsapi: —Poni, nema onejerana —nahi caji tahi. Tettideni ohuadsa: —¿Pablopa nama najarico? —tiquinarana. ¹⁸ Naraha ohuapi nema onejerani. Diopa occa ima nahato tajari: Ohuapi maidsera onani. Pina Dio maidsera tajarissa onajaro. Ohuapi jehe onanitide, poni onanitide onejerani. ¹⁹ Aji ohua, Silvano, Timoteo inadsa Dio Bedi Jesocristo tahimari tiadeni mari icanabaquidsa ettipi: —Jesocristocca imapi pajissa nitide, pajissa jeranitide —inejerade. —Pohua tahimari nemanehepi pajissa —inajaro. —Pohuapa pohua attissa inanaridsajaro —ihinanajarode. ²⁰ Jehe, Jesocristo pohuapa Imehi Dio huati tapojarissa inanajaro. Nema nadsapi Jesocristodsa iquejenajarojine Abi Diodsa etidsedsa ettipi: —Pajissa

nema nana —ihinanajaro. ²¹Nadsama Dio Pohuajinena Jesocristodsa iqueriqquiniijine icca jeheniji, ticcadeni naqui todacorani najaro. Pohuapa ia tocattejidساباقيجاري. ²²Nadsapi Pohua pocca iquejenani ahuato tanijinepi pocca nanajanodsa ia najanoridsajarissa najaro. Najaria aja Pohua Corime ibodidsa inanajari paja. Pohua Corime icajidsapi nidsa dsotode Pohua huati tapojaricca icajiniijine nahatoqquri inajaro.

²³ Ohuemecotedeni, omaidsa-jerani. Diopa obodi nahato tajari. Tiadenidsa pajissehera huati onejeradsapi Dio ohua najidsohui bica tani, onajaro. Aji tiadeni qquide Corintohuaji occapoma-jerajaropi tiadenidsa ohuati huana tadsa. Ohuatti oji ticanamananijine jipera onajarode. ²⁴ Tiadenidsa naqui: —Ajima tiquinaji —inaniijine tohuini inejerani. Jesocristodsa jehe tiquinanissa tani nahatoqquri inajaro. Tetidsemananijinena tiadeni acco camade tohuini inajaro.

2

¹ Jehe, tiadeni oji onanabaqquinijine jipera onadsapi: ¡Epeje! Tiadenihuaji occapoma-jeraccana, onajarode. ² Ojine oji oji tiquinadsapi ¿nejecojaridenina ohua inahatidsemanapadseje? Nohuerahitohui. Tijinedenina ohohuatidse najaro. ³ Najarojine tiadenidsa occa ima teppe dosse onajarode. Nani oqqejerana onajaropi tijinedeni oji onanijine jipera onadsa. Tijinedeni ohuatidsenijinena bica tani. Nahato onani: ohuatidsedsapi tiadeni naqui tetidsemananitohui. ⁴ Naraha occa ima teppe dsodode ojadsa titohuideni obodi huatoto canad-sapi: ¿Nejecoma quinahi? ohonanade. Obodi ocassera tadsa oji onade. Naraha occa ima teppe tiadenidsa dsodo onajaropi oji tiquinanijine jerani. Titohuideni ohuati

huana tani nahatoqquiri tiquinanijinena dsodo onajarode.

—*Ima tonanajaricca imadsa: “Epeje, eti ajimani” tiquinana*
—najari Pablo

⁵ Nadsama titiqueriquimana nanicca ojariapa ohua oji tonanajaride. Ohuaha oji onani ojari-gerani. Tiadeni naqui pohuajine oji tiquinade. Naraha najaro ojiepi imeni gerani. Ojine ima denima tojanijine jipera onani. ⁶ Aja tiadeni mota pocca imajine huati ticanaquimanajaripa epejena. Nanidsa jicana, onajaro. ⁷ Jidapapi pocca imadsa: —Epeje, eti ajimani —tiquinana. Nadsapa pohua bodi acco ticamamanajo, onajaro. Bodi ocassera tadsa madi-jararana. ⁸ Nadsapi ohuatti bica tadsa tiadenidsa huati onana, ohuattissa tinanamananijine. Puhuadsa tetideni huanacquiri nani ahuato tinanamanapomana, onajaro. ⁹ Najaro imatohui tahide tiadenidsa dsodo onapjarode ¿Ohuattidsa iboraququiri naco? onadsa. Nahato onanijine tiadeni nattome onabaququide. ¹⁰ Jehe, nadsapi najaricca imadsa, madija ohuahacca imadsa naqui: —Epeje, eti ajimani —tiquinadsapi ohua naqui poccadeni imadsa: —Epeje, ohuati ajimani —onajaro. Imecote ima cajidsapa nema onanitohui. Cristo obodi nahato tajari: nema onajaropi tiadenidsa ima ocassera tejeranijine. ¹¹ Nema inadsapi Diocca huadi Satana iadsa deni toja-jarahitohui. Pocca ima nahatoqquiri inani: ia tonehedima-baquihijine najorajari.

Pabloa Troadehuaji madi-dsanapohuijine jipera tajari

¹² Jehe, nadsama Jesocristo tahimari icassiejeranijinecca maride odsa panani Troadehuaji bacco onadsapi nahihujicca madimanajarideni mari ocanabaquihijine ia Medsedejine tohuabanissa tajarode. ¹³ Naraha nanidsa

imecote Tito bacco onajaradsapa pohuatohui obodi huatoto canajarojine omadinissa tejerade. Nema onadsapi ohuemecotedenidsa: —Masedoniahuaji occaccana —onadsa nanihuaji occajarode.

Pablopa Diodsa: —Epejeni, tijine bica tani —najari

¹⁴ Jehe, ima onihi, onihi caji taraha nema nehe Diodsa: —Epejeni, tijine bica tani —ihidsanapo nana, onajaro. Pohujine Jesocristocca deni tojehedsa iquejenadsapi deni iquejenajaro. Pohujine Jesocristo tahimari icassiejeranijinecca ecomeraridsadsapi dsama huapimadsa tojaridsajaro. Pina majo bicabote tojaribaquijarissa najaro. ¹⁵ Iapi pina majo bicabote Cristo Diodsa da inajarissa inajaro. Pohua tahimaridsa idsepe ijjaropi Diodsa bica tajaro. Idsepe ijiridsajarojine tocassiejerahijinedenidsa, tocassiejera-jarahijinedenidsa bacco inaridsajaro. Pina majo bicabote toccabaquidsa madijadsa bacco taridsajarissa inajaro. ¹⁶ Jesocristo tahimari tocassiejera-jarahijinedenidsapi pina majo tabaccora tajarissa najaro. Najari majopa dsoqqehejinecca. Naraha tocassiejerahijinedenidsapi pina majo bicabotessa najaro. Najari majopa camittehecca. Jesocristo tahimaridsa pajissa quinarajaridenidsapi dsoqqehe jiquejeranicca tojanitohui. Pajissa quinarajidenidsa camittehe jiquejeranicca tojanitohui. Naraha ¿nejecojarina najaro ima inajaribaquini-jine maride pajirahi? ¹⁷ Aja Dio Atti mamaridedeni motapa manaconitohuira mari mari nanaridsamana naraha iapi nema inejerani. Jesocristodsa iquejenajaropi pajissa Dio Pohua Atti ponira huati inanissa tanijine imadijaro. Ia Dossede Diopa ia qqui tabaquijari.

3

Diocca dosseniji dsati tahimarini

¹ Etti nema inadsapi tiadenidsa pina: —Iana bicacquiri inajaro, deni iquejenani —¿inajarossa najaroqui? Tiadenidsa icca ima nema nanitide. Naraha iapi nema inejerani. Dio Atti maride ohuahadenipa tiadeni mari tocanabaqqui-manahijine tohuini quinadsapa pohuadeni tahimari ima teppedsa dsodo nani nohue nohue quiquinanapojaro, —Jehe poccadeni marinaja imittana —tiquinanijine. Naraha iapi nema inejerani. Etti naqui tiadenidsa: —Iadsa ima teppe dsodo tiquinaji, odsa panani onihihuaji madimanajaridenidsa nohue inanijine —inejerani. Ima teppe jirehe maride jaijaridsajaro.

² Aji tiadenina icca ima teppessa tiquinajaro. Ticcadeni imapi ibodidsa pina dsodo najarossa najaro. Aja odsa panani onihihuaji madimanajaridenipa ticcadeni ima nemanehe nahatoqqiri najari. Ticcadeni madie bica tani qqui toquinadsapa pohuadenidsa ahuato tajaro: tiadeni mari icanabaqquinijine Dio ia tocadossebaqquijari. ³ Jesocristojine ticcadeni madie bica tajaro huapima qqui toquinajari. Najaro ticcadeni imapi pina Cristojine dsodo nani nohue inaridsajarossa najaro. Naraha najaro dsodo nanipi dsodsodo ppajaniccadsa jerani. Pina sibadsa dsodo najarossa nejerani. Dio camitta tajari Corimejine tibodidenidsa dsodo inajarossa najaro.

⁴ Jehe najaro imapi pajissa nahatoto inajaro. Jesocristocca iquejenarorejine Diodsa pajissa inanijine ipajirajaro. ⁵ Naraha Diodsa idsepe ijiniijine ia motta ipajirani inejerani. Diona idsepe ijiniijine iadsa inanajaro.

⁶ Puhujine inajoranissa tadsapi pocca jehe canireniji dsatidsa idsepe ijijaro. Najaropi pina Dio pocca dosseniji tahidecca Moisesidsa da inajarossa nejerani. Najaro dosseniji tahideccadsara madija madimanadsapa dsoqqehe jiquejeraniccadsa toquejenajari. Naraha Diocca jehe canireniji dsatidsa madimanajaridenipa dsoqqehe

jiquejeraniccadsa toquejena-jarajari. Camittehe jiquejeranicca, madie dsati naqui Dio Corime pohuadenidsa da inaridsajaro.

⁷ Diocca dosseniji tahideccapi Pohujine bica tapojaro. Ssono tetepihuaaji pocca deni tojehe, Pohua dsibehine ahuato inanadsa pocca dosseniji sibadsa dsodo inadsa Moisesidsa da injaro. Najaro ssonodsa Dio dsibehine dacoradsapi Moisesi panodsa dsapa tajaro. Naraha Moisesi pano dsibehi taha qquedsippanidsapa Isaraeri potemahideni cappinamanajari. Pohuahuaaji qqui naja camajajari. Pohua pano dsibehine bica taraha tohuatorara amossi najaro. Jehe Diocca dosseniji tahideccapi bica tajaro. Dacorehema ccajonaraha madijapa najarodsara madimanadsapa dsoqqehe jiquejeranihuaaji toquejena-jari. ⁸ Aji Diocca dosseniji dsati Pohua Corimecca dacorehema ccajonajarona denima bica tajaro. ⁹ Najaro imapi pajissa: Diocca dosseniji tahidecca madijadsa dsoqqehe inanajaropi bica taraha pocca dosseniji dsati madijadsa camittehe inanajarona denima bica tajaro. Pocca dosseniji dsatidsa iquejenadsapi Dio icca ima Pohuadsa inapajiranissa tajaro. ¹⁰ Nadsama Diocca dosseniji tahideccapi biquehe cajiporaha pocca marinaja dsaticca biquehena denima bica tajaro. ¹¹ Diocca dosseniji tahidecca bica taraha pina Moisesi pano dsibehine jicajarossa najaro. Naraha pocca dosseniji dsaticca biquehe deni tojajarona nema dsanaponitohui.

¹² Diocca dosseniji dsatipi bica tehe nema dsanaponitohui nahatoto inadsa najaro dosseniji ecomeraridsanjine icappina-jerajaro. ¹³ Najaro dosseniji dsatipi inajimajerani. Aja Moisesipa pohua pano dsibehine tohuatorani Isaraeri potemahideni qqui toquina-jarahijine pohua pano odsa najari quinahi nade. Naraha iapi pina Moisesissa inejerani. Diocca dosseniji dsati ecomeraniipi

ahuato tajaro. ¹⁴ Naraha Isaraeri potemahideni mittamanahijine huaribodeni sibaquiri najari. Puhadenipa Diocca jehe canirenijicca dosseniji tahidecca hua hua quinaporaha huaribodeni sibaquiri najonamanajaria aja jidapana naco mittamana-jarajaripaja. Cristona ojarijari huaribodeni inassiajabacquidsa mittamanahijine. ¹⁵ Jehe jidapana naco Moisesijine dsodo nanicca hua quinadsapa mittamanahijine bodideni pajiramana-jarajari. ¹⁶ Naraha madija bodi cacajiquimeradsa ia Medsede Jesocristodsa pajissa nadsana mittahissa tahitohui. Pina pohua pano ohodsa idijarossa nadsapa qqui tahissa tahitohui. ¹⁷ Ia Medsede Pohua Corime naco pohuassa caniquimerajari. Pohua Corime iadsa madidsapa imasiridsa imadipojaropi jicani. ¹⁸ Najarojinea iapi pina Moisesi pohua pano odsa najarissa inejerajaro. Ia huapimapi pina pipirissa inadsa Diocca biquehe, pocca deni tojehe ahuato inanaridsa-jaropaji. Ia Medsedejine icca madie tobicadsanapojaro, pina pohuassa inanijine. Dio Corime iadsa madidsapa ia acco tocamabaquid-dsanapojari.

4

Pablotenipa Jesocristo tahimari ponira mari mari quinajari

¹ Nadsama Diopa iadsa huati huana tadsa Puhadsa idsepe ijiniijine iadsa inanajaro. Najarojine ehetidse nadsapi: —Epeje, ineboquina —inejerani. ² Icca mari-naja pajiranissa tadsapi icappinaniijine nohuerani. Ahuatoranidsa ima inana-jerani. Maidsehe mari mari inejerani. Nema naniccapi ettajojaro. Icca mamari tabaqqi icamaidsabaqqi-jarahi. Ijine Dio Atti tojidsa-jerani. Nohuerani. Diopa ia qqui tabaqqihi. Pajissara huati huati inajaro nahato tahi. Najarojinea madija huapima iadsa: —Maidseraqqiri nahi —quinajari. ³ Aji Jesocristo tahimari icassiejeraniijinecca ecomeraridsajaropi ahuato

taraha madija mota tocassiejera-jarahijinedenidsapi ahuatorata tajarō. Pohuadenidsa pina dsidsi tajarossa najaro. ⁴ Najarideni Jesodsa jehe quina-jarajaripa aji-jaro dsamacca dodossede Satana bodideni ecossabaquid-sanapojari. Nama quinadsapa Jesocristo tahimari icas-siejeranijinecca bodidenidsa tossiaja-jerajaro. Cristo bicabote, ssiaja tahi, Imehi Diossa najari tahimari mari mari inajaro mittamana-jarajari. ⁵ Iapi icca ima ehecomera nejerani. Ia Medsede Jesocristo pohua tahimarina ehecomera najaro. Pohuadsa eti huanaququiri nadsa tiadeni acco icamabaquuinijine imadijaro. ⁶ Diopa dsama inahatopodsama huati tajari: —Dsidsinidsa ssiajani tossiajaridsana —napodsapa ssiajani tossiajabaquujaro. Ibodidsa naqui Pohua ssiejene inajaro, pocca biquehe, pocca deni tojehe nahatoququiri inanijine. Najaro pocca biquehe, pocca deni tojehepi Jesocristo pohuadsa ahuaoto tajarō.

Ocasserani eraha Jesocristodsa jehe idsanapojaro

⁷ Diopa aji-jaro ima bicani iadsa inajaropipi pina tod-sepetaji huatini ccara tanicca dsipa ssiqui nepi nanidsa hua idsajarossa najaro. Iapi pina dsipassa inajaro. Es-sirepi dsoqqeque tanicca, dacorejerani. Nema inadsapi madija huapimadsa ahuaoto tajarō: Diocca deni tojehe, pocca dacorehepi Pohua pocca. Icca jerani. ⁸ Nema nadsapi ima onihi, onihi iadsa ssonariraha iedima-jerani. Ima onihijine ibodi huatoto canaraha: —Cristodsa epeje inana —inejerani. ⁹ Ia tonajidso-baqquimanaraha Diopa ia nebo-jarajari. Ia tonajica-baqquimanahijine huahuacca iquejenaraha ia tonajica-baqquimanahijine pajiramana-jarajari. ¹⁰⁻¹¹ Ahuaji jaija, ahuaaji jaija naridsadsa najidsohue oppina tanicca inahanajaropipi pina Cristo najidsohue inahanajarossa najaro inahanani huapima qqui toquinajari. Pohuadsa iquejenarōjine dsoqqeque iadsa

huajira huajira naridsajaro. Nema inajaropi essire dsoqueque taniccadsa Jesocristocca madie ahuato inajararo. ¹²Nadsapi najidsohue iadsa ssonaridsa idsoqquebote idsoqquebote naridsaraha nema nehe idsepe ijijarojine tiadenipi camittehe ticajimananitohui.

¹³ Aji Dio Atti dsodo nanidsapi ajima najaro: —Diodsa pajissa onajarojine pocca ima huati huati onajaro —napojari tamine Dabi. Najarossa inajaropi Diodsa pajissa inadsa pocca marinaja dsati ecomeraridsajaro. ¹⁴ Ibodidsa nahatoto inajaro: Dio ia Medsede Jeso inahatonijaripa ia Jesodsa jehe inajarodeni ia tonahatonibaqquihitohui. Dsotode naco tiadeni, ia, huapima Pohua madihihuaji ia tohuaccamacossani-baqquihitohui. ¹⁵ Aji ocasserani inahanajaro huapimapi ponima jerani. Tiadenidsa ima bicani tojanijinena inahanaridsajaro. Nadsapi tiadenidsa, madija ohuahadenidsa naqui Diocca tohuati huanehe tojaridsadsa madija huapi taha Diodsa: —Jehe Abi Dio, tijine bica tani —quinahitohui. Pocca deni tojehe, pocca biquehe naqui qqui toquinahitohui.

¹⁶ Najarojinea ehetidse nadsapi: —Epeje, ineboqquina —inejerani. Iapi jadahi iquejenajonajaro. Essire tojapariraha ibodina huajijiradsa todacorani dsanapojaro. ¹⁷ Ajijaro namidsa ocasserani ejaropi badsira tani, jicaca tani. Naraha najarojine Diocca biquehe, pocca deni tojehe jicaquera tanicca denima denima iadsa tojadsanaponitohui. ¹⁸ Nadsapi innocodsa qqui inajarocca, essiredsa inahanajarocca tohuira ibodi huahuatomacca nejerani. Nema naniccapi jicanitohui. Naraha qqui inejeranicca, dsotode tojanijineccapi jiquejeranitohui. Najaro tohuira imadijaro.

5

Essire dsati icajinjinecca ima

¹ Ajijaro namidsa imadidsapi essire jicaca taniccadsa imadijaro. Pina ajijaro namicca odsa icanahatojarossa inadsa imadijaro. Pina benehijinecca odsa jicaca tanicassa inajaro. Naraha nahatoqquiri inani: Icca odsa namicca tocatabaccoradsapi memehuajina odsa dsati icajinitohui. Najaropi madijajine canahatojarossa nejerani. (Najaropi essire dsati jicaquera tanicca icajinijine Djojine iadsa najorapojarocca ima.) ² Naraha ajijaro namicca essire jicaca taniccapi ocassera tajarojine ojiema imadijaro. Essire memehuajiccana tohuini inajaro. ³ Najaro essire dsati icajinijinepi pina etero edsajarossa nanitohui. Edsadsapi iccoroje jeranitohui. (Najaropi memehuaji icorime toccadsapi poni motta jerani, essire dsati cajinijinecca ima.) ⁴ Pajissa ajijaro namidsa imadiccadsapi essire jicaca taniccadsa imadijarojine oji oji idsanapojaro. Ocasserehepi iadsa ccanaja tajarossa najaro. Naraha essire jirehe imadinijine tohuini inejerani. Essire dsatina tohuini inajaro. Najaro icajidsapi jicaca tanicca inebonitohui. Camittehe jiquejeraniccadsana imadi-dsanaponitohui. ⁵ Najaro ima bicani nemaneha icajinijine Diopa ia tonanajorabaqqijari. Puhuapa pajissa najarossa inananitohui nahatoqquiri inajaropi Pohua Corime iadsa da inaridsapojaropaji.

⁶ Nema nadsapi ibodi icappina-jeradsa Djojine etidsed-sanapojaro. Nahatoqquiri inani: Essirema imadiccadsapi ia Medsede madihuhaji huaji inaccani. ⁷ Aji memehuaji imadi-dsanaponijinecca iadsa najorajaro inoccodsa qqui inejeraccaraha ibodidsa nahato inadsapi pajissa inehe imadijaro. ⁸ Najarotohui etidsedsapi icappina-jerajaro. Ajijaro essire inebonijine tohuini inani, ia Medsedehuaji iccanijine. Ia Medsedehuaji imadi-dsanaponijinena iadsa denima bica tajaro. ⁹ Nadsapi essirema imadiccadsa ia Medsede inahatidse-dsanapohuijine dissessera inajaro.

Essire inebodsa memehuaji imadidsa naqui nema id-sanaponitohui. ¹⁰ Nidsa dsotode Cristo pohua baccohuaji huapima idomo huadsapi icca ima cattedmade tojahitohui. Nadsana ia essirema imadidsa ima inanajarocca huapima Cristo nattome inanitohui. Ima bicani inanajaro manaconi, tabaccorehe inanajaro manaconi naqui huapima iadsa inananitohui.

Diopa icca imadsa tojonehijinecca marinaja

¹¹ Dio noppine icappinanijinepi bica tani. Pohuadsa iboraqquri inanijine naqui bica tani. Najaro nahatoto inadsapi madija huapima Pohuadsa jehe quinahijine dissessera inajaro. Diopa ohua, Timoteo tedseje ibodi qqui tahissa tahi. Maidseraqquri inani nahato tahi. Tiadeni naqui maidseraqquri inani nahatoqquri tiquinanijine tohuini inani. ¹² —Icca ima bicani, pajiranissa tani —inajaropi ia ipamehe iadsa etidsenijine jerani. Tiadenina iadsa tetidsemananijinena tohuini inani. Icca ima nahatoqquri tiquinadsapi aja ia ajamani tonanabaqqujari attidenidsa tecomeramananijine tipajiramananitohui. Najaridenipa: —Iana deni iquejenani, nahatoqquri inani —quinaraha madija panodenira qqui toquinajari. Madija bodidenicca ima ssamoqquri najari.

¹³ Nadsama madija attideni iadsa: —Bodideni tossamomanajari —quinadsapa apaja, pohuadeni nama quinana. Aji idsepe ijjaropi Diona deni tojahijine. Madija ohuaha attideni naco iadsa: —Nahatoto tahi —quinadsapa tiadenidsa naqui bica tani. ¹⁴ Cristopa itohui dsoqquejari, ia naqui pina pohua dsoqquejarissa inajaro. Najaro nahatoqquri inadsapi Cristocca tohuati huanehepi ia dosse dosse najarossa najaro. Najarodsa idsepe ijjonajaro ajijaropaji. ¹⁵ Cristopa huapima itohui dsoqquejari. Nadsapa

pohuajine madie dsati cajimanajaridenipa pohuadeni tohuini quinahicca tohui madimana-jarahi. Cristo pohua tohuini nahicca tohuira madimanajari. Pohuapa pohuadenitohui dsoqqe, nahatoni najari.

¹⁶ Jidapapi Cristocca tohuati huanehe nahatoto inad-sapi madijadenicca ima ajijaro namicca deni tojehedsa nattome inejerajaro. Tahide Cristodsa ssamoqquri inaccadsapi pohuadsa nema inade. —Pohuapa Dio Bedi, deni tojahi —inejerade. Naraha jidapapi pohuadsa nema inejerani. ¹⁷ Nadsama madija Cristocca tojajaripa Djojine dsati tojajari. Pocca madie naqui cacajiquimerajaro. Pocca imabotedsa tojani-jarahi. Jidapapa madie dsati cajjari.

¹⁸ Najaro madie dsatipi Diocca. Pohuapa iadsa huadi taporaha Cristo itohui dsoqqedsapa Pohua tedseje cajonerajropaji. Dio iadsa huahua najaripa Pohuadsa idsepe ijiniijine, madija mari icanabaqquidsa Pohua tedseje cajonerara canahijine. ¹⁹ Cristo ahua porimacossanidsa dsoqqejarijine Diopa madijacca imasiri manaconi pohuadenidsa inana-jerani. —Ticcadeni imasiri ohuati ajimani —najari. Nama nadsapa pohuadeni tedseje cajonerara canajari. Najaro ima bicani ecomeraridsanijine ia tocadossebaqqujari. ²⁰ Nadsama iapi Cristo tahimari totohuaccade iquejenani. Tiadenidsa huati inajaropi pina Dio tiadenidsa huati tajarissa najaro. Etti bica tadsa Cristo onima tiadenidsa huati huati inajaro: —Dio tedseje cajonerara canaji —ihinanajaro. ²¹ Cristopa imasiri inana-jeraraha icca imasirijinena Cristopa imasiri ponissa nadsa Diocca huadie pohuadsa ssonarijaro. Dio nama najaria ia Cristodsa ijariquijaro icca ima Pohuadsa pajiranissa taniijine.

6

¹ Nadsama Diodsa idsepe ijjaropi tiadeni acco camade imadijaro. Nadsapi ettissa tinanamananijine etti bica tadsa tiadenidsa huati inajaro: Dio pocca tohuati huanehe tiadenidsa ahuato inanadsapi ponima tinanamana tejeraji, inajaro. ² Aji Dio Atti dsodo nanidsapi Pohua Attia:

—Jehe, tiadsa occa tohuati huanehe ahuato onanani-jinecca huada bacco tadsapi ohuadsa huahua tadsa omittanitohui.

Tia onassijanijinecca huada bacco tadsapi tia acco oca-manitohui —nahi nade.

¡Pajissa! Jidapanana pocca tohuati huanehe ahuato inananijinecca huada bacco tani. ¡Jidapanana ia tonassija-baqqihicca huada bacco tajaro!

Pablopa Diodsa dsepe ijidsa ocasserani ahuaridsajari

³ Diodsa idsepe ijidsapi icca madie bica tani madija qqui toquinahijine dissessera inajaro. Nema inejeradsapi Diocca dossehe idsepe ijijaro tossamorana. Madija attidenipa: —A, pohuadenijine bica tejerani —quina-jarahijine imadinissa tajaro. ⁴ Dio ia tocadossebaqqi-jaridsa idsepe ijjaropi madija huapimadsa ahuato tanijine jipapa inajaro. Nema nadsapi ima onihi onihi iadsa ssonariraha mohuaradsa inahanajaro. Imadini-jinecca icappiradsa naqui mohuaradsa icappirehe imadijaro. Ima ocassera tanicca naqui nema nehe mohuaradsa inahanajaro. ⁵ Cocossirideni inahana, toponi cocorodsa ia hua todsimabaqquidsa inahana, mohuaniji tojarid-sadsa iadsa ssonarimanahi inahana, tarabadsa najo tanicadsa idsepe ijiridsani inahana, dsome inocco bissani inahana, pemi naqui inahana naridsajaro. ⁶ Pajissa Dio ia tocadossebaqqi-jaridsa idsepe ijijaro ahuato tanijinepi imasiri jirehe imadijaro, Diocca pajissehe nahatoto inajaro, ima najo tanicca inahananijine nahatoto inajaro,

huapimadsa joneqquri inajaro, Dio Corime iadsa madijari, maidserehema madija huapimadsa eti huana tajaro. ⁷ Diocca ima bicani pajissara mari mari inajaro. Pocca dacorehe icajini iadsa ahuato tajaro. Icca ima Diodsa pajiranissa tajaropi pina jadsirejine icajijarossa najaro. Ia huadidedenidsa issonarinijine icaji, iadsa ssonarimanadsa naqui ibiquera-geranijine icaji najaro. ⁸ Huada onihidsapa madija iadsa bicaqquri najari. Iadsa: — Ajaridenipa bicaqquri nahi —quinajari. Naraha huada onihidsapa madija ohuaha iadsa jiperaqquri najari. Iadsa: —Ajaridenipa tabaccoraqquri nahi —quinajari. Pajissa huati huati inajaroraha iadsa pina maidsaqquri najaridenidsassa quinajari. ⁹ Iadsa nahatoqquri naraha pina iadsa noccodeni jidsaqquri najaridenidsassa quinajari. Ecotabote naridsaraha camittaqquri inaccani. Ia tonajidsobaqqi-manaraha ia nanadsoqquemana-jarahi. ¹⁰ Pina oji inajarossa naraha nema nehe Diodsa etidsejaro. Pina icappirajarossa naraha Diocca daniji ima bicani icajijaro. Ijine naqui Diocca daniji madija huapimadsa tojaridsajaro.

¹¹ Jehe ohuemecotedeni Corintocca, imadsa-geradsa ima mota naqui ecoma-geradsa tiadenidsa huati huati inade. Ibodidsa icajijaro tiadenidsa inahabajarossa najaro. ¹² Iapi tiadenidsa eti huanaqquri naraha tiadenina iadsa tetideni huaneraqquri najarossa tiquinajaro. ¹³ Nema nadsapi tiadenidsa pina occa ejedenidsa huati onajarossa najaro: Ohuadsa tetideni huanaqquri naji. Pina tiadenidsa ohuati huana tajarossa tiquinana, onajaro.

Essirepi Dio camitta tajaricca mamadi

¹⁴ Jehe, tiadenidsa ohuatti naqui: Jesocristodsa jehe quina-jarajaridenidsa tiquejemamana tejeraji. Aji ima bicanipi imasiri tadsajani quejemanijine ssamo tani. Pina

ssiajani dsidsini tadsajani quejemanijine ssamo tajarossa najaro. ¹⁵ Najarossa najaro Jesocristo naco pocca huadi Satana tedseje cajonerahijine ssamo tahi. Jesocristodsa jehe najari naco aja Jesocristodsa jehe najarajari tedseje jehe canirehissa tahijine ssamo tahi. ¹⁶ Ia Diodsa jehe inajaro essirepi Dio camitta tajaricca mamadi iquejenajaro. Nema inadsapi madijacca dio pohuamaccadsa iquejenanijine ssamo tani. Ajana Dio Pohua Attipa:

—Ohuapi pohuadenidsa omadinitohui;
pohuadenidsa naqui occaridsanitohui.

Ohuapi pohuadeni Cacahuade Dio ojanitohui
Pohuadeni naco occa madija toquejenahitohui
—napohui nade.

¹⁷ Nama nadsapa Pohua Atti dsodo nani onihi naqui:

—Ohuadsa jehe quina-jarajaridenidsa huajiji tinaji.
Oppina tahicca, jipera onaniccadsa damamana tiquinejer-
aji.

Nema tiquinadsapi tiadenidsa: “Jehe, Ohuadsa jai tijajon-
aji” onanitohui.

¹⁸ Ohuapi ticcadeni Abi ojanitohui.

Tiadeni naqui occa ejedeni tiquejenanitohui
—nahi nade ia Medsede Dio Dacorabote.

7

¹ Ohuemecotedeni, tiadenidsa ohuati huana tani. Dio pocca madijadsa huati tapojaricca jidapana aji iadsa bacco najaropaji. Nema nadsapi ibodi huire tehe imadina. Essire inatabaccora-jeranijine ia ecahuana. Pina issicari-jeranijine obanidsa iccarihuajajarossa inana. Dio noppine icappinadsa imadinissa dsanapona. Ibodi huire, ssiaja tehe imadi-dsanaponijine Pohuadsara dissessera inana.

*Corintohuaji madimanajari bodideni cacajiquimeradsapa
Pablo huatidsejari*

² Tiadenidsa huati omanipomana: ¡Iadsa jipacquiri tiquinapomaji! onajaro. Nadsa tiadenidsa icca ima pajiranissa tade. Tiadeni inajidsobaqqi-jerade. Maidsehedsa naqui tiadeni icamaidsabaqqi-jerade. Nohuerade. ³ Nema onajaropi ticcadeni ima bica tejerani, onejerani. Pina tahide tiadenidsa huati onajarossa najaro huati omanipomajaro: Titohuideni ohuati huana tajaro. Najaropi omadidsa, odsoqquedsa naqui tiadenidsa ohuati huana tajaropi nema dsanaponitohui. ⁴ Tiadenipi ima tinapajiramananissa tajaro nahato onani. Ticcadeni ima bica tajarojine ohuatidsejaro. Ocasserani eraha nema nehe obodi bica tadsa ohuatidseni.

⁵ Dsama Masedoniahuaji bacco inadsapi jassi inejerade. Ima ocassera tanicca jiquejerade. Ahuaji ima, ahujaji ima naridsadsapi ibodi naqui icappinajarode. ⁶ Naraha Diopa madija bodi ocassera tadsa huatidse-jarajari nahatidsede pajirajari. Puhuapa ia tonahatidsebaqquijaride, aja imecote Tito bacco najonadsa. ⁷ Tito qqui inadsa pocca ima imittadsapi etidsede. Pohua attipa: —Corintocca imecotedenijine ohuatidsede —najari. Pohua atti naco: —Pablo, tia qquide tohuini quinajari. Tiadsa ima ssonarjjarojine titohui oji oji quiquinanajari. Tiadsa huatideni huanaquqiri nadsapa titohui disseraquqiri najari —nadsapa pohujine denima ohuatidsejarode.

⁸ Occa ima teppe tiadenidsa dsodo onajaro qqui tiquinadsa oji tiquinani omittadsapi: Jaho ojine bica tejerajaro, onapode. Naraha jidapana nema onejerani. Aji oji tiquinajaropi badsira tani, huada huapi tejerade. ⁹ Jidapapi tijinedeni ohuatidseni. Aji oji tiquinarojine jerani. Tibodideni cacajiquimeradsa Diodsa tiquejenanipomajarojinena ohuatidsejaro. Ticcadeni ojie ocassera taraha nema nehe tinahanamanajaropi Diodsa bica tani. Nema nadsapi occa ima teppe tiadeni tonajidsobaqqi-

jerani nahato onani. ¹⁰ Jehe oji tiquinajarojine tibodideni cacajiqquimeradsa Diodsa tiquejenani-pomajaropi Diodsa bica tajaro. Najaro ojiedsapi: —Jaho ojiepi tabacora tani —tiquinejeraji. Najaro ojiejnena ticassiejeran-itohui. Naraha ajijaro namicca imadsa disseraqqiri najarideni oji oji quinaraha dsoqquemanadsapa najidsohue jiquejeranihuaji toquejenahitohui. ¹¹ Aji ojie tinahanamanajaropi Dio jipa tahiccassa tinanamanajaro. ¡Ajina, qqui! Tijinedeni ima bicani tojajaro. Ima tonanajari tiadenidsa qquedsima-jarahijine teccocomanajaro. Ticcadeni ima tobicanijine tohuini tiquinajaro. Ima tonanajaricca imadsa tedimanajaro. Pocca imajine najidsohue tiadenidsa ssonarini noppineni ticappinamanajaro. Ohua qqui tiquinapomanijine, ohuadsa ima jicanijine naqui tohuini tiquinajaro. Ima tonanajari pocca ima manaconi tonahanahijine naqui tohuini tiquinajaro. Nema tiquinadsapi ohuadsa ahuateo tinanamanajaro: Ima tonanajaricca imadsa tiquejemamana-jerajaro. ¹² Nema nanipi tiadenidsa occa ima dsodo onapojaropi ima tonanajari tinajidsomanahijine dsodo onani ojari-jerade. Puhajine imecotedsa ima ssonarijaro acco ocamahijine naqui dsodo onani ojari-jerade. Aji tiadenidsa pajissa itohui tibodideni huatoni paji naccani tiadenidsa ahuateo tanijinena dsodo onajarode. Itohui tetideni ajimamanajerani Dio nahato tajari. ¹³ Najarojinena ibodi tobicajaro. Icca ojie eti ajimadsapi etidsejaro.

Ima onihi naqui Tito ticatidsemanahi imittadsapi denima etidsejaro. Ticcadeni ima pahuadsa bica tajaro. ¹⁴ Nadsama Titodsa ticcadeni ima huati onapode. Ohuati-pi pahuadsa: —Corintocca Jesocristodsa jehe quinjari-denicca ima bica tadsa ohuatidsejaro —onapode. Nadsapa Tito tiadenihuaji toccadsa pajissa ticcadeni ima bica tani qqui tadsapa ohuatti dsori tejerani qqui tajari. Pina

tiadenidsa pajissara huati huati onajarossa najaro Titodsa naqui pajissa huati onajaro. ¹⁵ Nadsapa Tito pohua attidsa iboraqqiri tiquinani pohua bodi huatomadsapa huatidsejari. Pohua noppine ticappinamanadsa naqui pohuadsa bicaqqiri tiquinade. Najarojine Titopa tiadenidsa denima huati huana tajari. ¹⁶ Tijinedeni pajiranissa tanijine tohuini tiquinani nahato onani. Najarojine tiadenidsa ohuatidsejaro.

8

Accoraqqiri najarideni cappiramanajaridenidsa da inacquimananijine

¹ Jehe ohuemecotedeni, jidapanana dsama Masedoniacca Jesocristodsa quequeriqqimana najaridenidsa Dio pocca biquehe, pocca tohuati huanehe inanaridsajarocca ima tiadenidsa huati onana. ² Nahihujicca imecotedenipa ocasserani onihi onihi inahanamanaraha huatidsemaneri najari. Puhuadenipa cappiramanaha madimanaraha accoraqqiri nadsapa pina sseqqiri najaridenissa quinajari. ³ Pajissa onocodsas qqui onajarocca tiadenidsa huati onajaro. Puhuadenipa huatidsemaneri nadsa da inacquimanajaro. Denima da quinanijine pajiramanajararaha denima da quinapomajaro. Madija ohuaha pohuadenidsa: —Nema tiquinaji —quina-jararaha. Puhuadeni tohuini quinadsa: —Jari, nema inanana —quinajari. ⁴ Dsama Jodeahuajicca Diodsa toquejenajarideni acco icamabaqqi-manahijine tohuini quinadsapa iadsa huatide disseraqqiri najari. Attidenipa: —Icca da naqquinaja pohuadenidsa dosse inanijine jehe tiquinaji —quinade. ⁵ Nadsama iapi poccadeni da naqquinajacca ima nahatoto inaporaha denima ima bicani inanamananijinepi ssamomo inapojaro. Aja pohuadenipa Diodsa pohuadeni ccaccoramanajari. Iadsa

naco pohuadeni ccaccoramanajari, ettidsa iboraqquri nahijine. Nama quinadsapa Dio Pohua jipa tahicca inanananissa tajaro.

⁶ Nadsama Masedoniacca Jesodsa jehe quinajarideni tahimarideni bica tadsapi Titodsa ajima inajaro: —Tito, Corintohuaji ticcanidsa poccadeni da naqquinaja tidipomaji —inade. Aja pohuapa tahide ticcadeni da naqquinaja idipode. Nadsapi najaro da naqquinaja bicabote jicanissa tanijine Tito dosse inanipomajari. ⁷ Tiadenipi ima bicani ssequiri tiquinajaro. Diodsa jehe tiquinani dacorajaro. Dio Atti maride naqui nahatoqquri tiquinajaro. Diocca dosseniji timittamananissa tajaro. Timecotedeni accode naqui disseraqquri tiquinajaro. Ijine tohuati huanehe ticahatterajaroma timadimanajaro. Nema tiquinadsapi timecotedeni cappiramanajarideni acco camade naqui accoraqquri tiquinani bica tani, onajaro.

⁸ Naraha ohuatti nema onajaropi tiadenidsa dosse dosse onejerani. Jesocristodsa quequeriqqumana najari ohuahadenicca da naqquinaja tahimarini timittamananijine poccadeni ima dsodo onajaro. Aji poccadeni ima timittamanadsapi tiadeni naqui jipaqquri tiquinadsa da taqqumana-pomanijine, onajaro. Accoraqquri tiquinadsapi pajissa timecotedenidsa tetideni huanaqquri nani ahuato tinanamananitoahui. ⁹ Tiadenipi ia Medsede Jesocristocca biquehe, pocca tohuati huanehe nahatoqquri tiquinani. Pohuapa memehuaji madidsa huapima cajiari. Cappira-jaraha madihissa tapojari. Naraha titohuideni namihuaji ccaronadsapa pina cappirajarissa naha madijarijine tiadenipi ssequiri tiquinajaro.

¹⁰ Aja huajano toccapojaridsa dsama onihicca Jesocristodsa quequeriqqumana najaridenicca da naqquinaja nohuerapoccadsa tiadenina tahide: — Imecotedeni acco icamabaquina —tiquinadsapi

tetidsemanadsa najaro ima tinahatomanapojarode. Nadsama tiadenidsa ima bica tanijinepi obodi huatojarocca tiadenidsa dsodo onajaro. ¹¹ Aji ticcadeni da naqquinajapi tinequeriquimananissa tana. Pina huajano toccapjaridsa tetidsemanadsa da taqquimanapojarossa tinanamanana jicanijine. Sseqquiri najarideni, badsira tehe cajimanajarideni naco pohuadeni cajimanahicca mota da quinana. ¹² Madija cajidsa pajissa dade jipa tadsapa pocca danijidsa Dio jipa tajari. Madija cappiradsa da inejeradsa oppinera tani. Diopa cappirajaridsa: —Da tinaji —najarajari.

¹³ Najaro da naqquinajacca imapi timecotedenid-sara da tiquinadsa tiadenipi ticappiramana nanijine jerani. Tiadeni ticappiramana-jeradsa timadimana, pohuadeni naco cappiramana-jaradsa madimana nadsana bica tani. ¹⁴ Jidapana ticajimanadsa pohuadeni acco ticamabaqqui-manahijine tipajiramanaccani. Nidsa dsotode tiadeni naqui ticappiramanadsa manaco tiadeni acco tocamabaqqui-manahitohui. Ahuaji nema, ahuaaji nema inaridsadsapi huapimadsa pajiranissa tanitohui. ¹⁵ Pina Isaraeri potemahi jodiodeni tahimaridenissa najaro. Pohuadeni tapari memehuaajicca catojaridsajari inaccamanahi tahimari Dio Atti dsodo nanidsa ajima najaro: —Huemahi inaccamanajari pohuadenidsa mota tojararahi. Badsira taha inaccamanajari naco dsori taja camajarahi —nani nade Dio Atti dsodo nanidsa.

Tito pohua tessedeni pamaha tedseje da naqquinajatohui Corintohuaji jai tojahijine

¹⁶ Diodsa ohuatidsedsa: —Jehe Abi, tijine bica tani —onajaro. Diojine Tito bodipa pina obodissa nadsapa pohua tedseje titohuideni dissessera inajaro. ¹⁷ Pohuapa tahide tiadeni qquide tohuini napojari. Tiadenihuaji

toccahijine pohuadsa huati onadsapi amadsati: —Jehe, jipa onani —najari. Jidapana pohua jipa tadsa toccajari.

¹⁸ Aja Titodsa imecote Jesocristodsa jehe najari ohuaha naco tiadenihuaji dosse inajari. Pohuapa Jesocristo tahimari icassiejeranijinecca maride nahato tajari. Jesocristodsa quequeriqquimana nahicca onihi onihi naridsajarrocca imecotedeni pohuadsa jipaqquri najari. —Pohuapa bica tajari, Dio Atti maride nahato tajari —quiquinanajari. ¹⁹ Najari imecotepa iadsa toccahijine icattejidsa-manapojari. Aji huapimacca da naqquinaja Jerosarehuaji iaccadsapi ia acco tocamabaqquihijine. Najaro da naqquinaja imecotedenidsa da inadsapi Diodsa huatidsemanadsa: —Jehe Abi Dio, tijine bica tani —quinahijine. Imecotedeni acco camade jipaqquri inajaro naqui ahuato tanijine. ²⁰ Najaro da naqquinaja bicabote ididsapi iaccanissa tanijine tohuini inajaro. Inassamodsapi: —Tijinedeni bica tejerani —quinarana, inajaro. ²¹ Najarojine ticcadeni da naqquinaja iaccanissa tana, inajaro. Diodsa, imecotedeni huapimadsa naqui icca ima bica, pajiranissa tanijine tohuini inajaro.

²² Pohuadeni pamahadsa imecote Jesocristodsa jehe najari ohuaha toccahijine dosse onajari. Pohua dsepe ijiridsahi onihi onihi qqui qqui odsanapodsapi pohuapa madija acco camade jipa tahi nahato onani. Ticcadeni ima mittadsapa tiadenihuaji toccade jipa tajari. Pohua atti naco: —Jehe imecotedeni Corintohuajiccapa pohuadeni attissa inanamananitohui —najari.

²³ Nadsama Titodsa madija attideni: —¿Ajaripa nejeco madija? —quinadsapa huati tiquinana: —Pablo huati-made, tiadeni acco camade Pablo pohua tedseje dsepedeni ijimanajari —tiquinana. Imecote pamahadsa naco: —¿Nejeco madijadeni? —quinadsapa ajima tiquinana: —Jesocristodsa quequeriqquimana najaridenicca dosseniji

huedajonajari —tiquinana. Pohuadenipa Jesocristojine poccadeni madie bica tadsa madimanajari. ²⁴ Nema nadsapi nahi tiadenihuaji bacco toquinadsapa Diocca tohuati huanehema pohuadenidsa bicaququiri tiquinana. Nema tiquinadsapi Jesocristodsa quequeriqquimana najarideni Titodenidsa tetideni huanacquiri nani nahatoququiri nahijine. Aji etti naqui: —Corintohuajicca Jesocristodsa jehe quinajaridenipa bicaququiri nahi —inajaro huati huati inaridsapojaro naqui pajissa tojajaro nahatoququiri nahijine.

9

Jesocristodsa jehe quinajaridenidsa da naqquinaja tahimarini

¹ Nadsama Jerosarehuajicca Jesocristodsa jehe quinajarideni acco ticamabaqqui-manahijine ticcadeni da naqquinaja tahimarini tiadenidsa huati onapode. Nadsapi ajijaro ima teppedsa: —Da tiquinaji —onapomajerani. ² Pohuadeni accode jipaququiri tiquinani nahato onapojarojine dsama Masedoniahuaji occaridsadsapi titahimarideni huati huati ohonaridsa najarode. Ticcadeni ima bica tajarojine ohuatidsedsa pohuadenidsa ajima onade: —Ohuemecotedeni dsama arobeni Acaiahuaji madimanajaridenipa huajano toccapojaridsa imecotedeni Jerosarehuajicca acco icamabaqqui-manahijine najoramanapode —onaridsajarode. Nadsapa imecotedeni Masedoniacca mota huapi taha ticcadeni ima bicani mittamanadsapa pohuadeni naco: — Jehe ia naqui imecotedeni Jerosarehuajicca acco icamabaqquina —quinajaride. ³ Tiadenipi dade jipaququiri tiquinani nahato onaraha tiadeni acco tocamabaqqui-manahijine imecotedeni 3 quinaha tiadenihuaji dosse onabaququijari. Nema onajaropi da taqquimananijine

tinajoramananissa tanitohui. Nadsana titahimarideni huati huati onaridsapojaro pajissa tojadsapi etti maidsehe toja-jeranitohui. ⁴ Nani tiadenihuaaji occapomadsapi imecotedeni Masedoniacca naco ohuadsa jai tojahijine itide. Naraha ticcadeni da naqquinaja tinajoramana-jeradsa bacco inadsapi ¿nejecoma onapadseje? Ticcadeni imajine ohuatidseporaha ohuattissa tinanamana-jeradsapi obodi ocappinanissa nanitohui. Tiadeni naqui da taquimana-jeradsapi ticappinamananissa narana, onajaro. ⁵ Najaro noppineni ocappinadsapi tiadenidsa huatide Titodeni dosse onabaqquipona, onajarode. Pohuadenipa tiadeni acco tocamabaqqui-manahitohui, ticcadeni da naqquinaja tinajoramanaponijine. Aji tahide tettidenipi: —Jehe da inaqqunitohui —tiquinapojaro tettidenissa tinanamanana, onajaro. Nema tiquinadsapi accoraqquri tiquinani ahuato tanitohui. Naraha dade jiperaqquri tiquinadsa ticcadeni da naqquinaja tinajorapo-jeradsapi ticcadeni accohue ahuato tanitohui.

⁶ Ajijaro imadsa tibodideni huatoma-manaji: Madijapa ppa nahi nocco badsira taha dappo inadsapa bono badsira taha pore ina tahi. Huemahi dappo inadsapa bono huemahi pore ina tahi. ⁷ Madija pohua tesse accode jipa tadsapa bodi huatodsa: —Ajima nehe da onana —nadsa da inadsapi pocca ima Diodsa bica tani. Madija acco taraha da inadsapi pocca ima Diodsa bica tejerani. Madija dade jipera taraha madija ohuaha attijine da inadsa naqui pocca ima Diodsa bica tejerani. Dadecca ima Diodsa bica tajaropi madijapa bodi huatidsedsa da inadsana pohuadsa Dio huatidsejari. ⁸ Diopa tiadenidsa bica tanicca onihi onihi dade accora tajari. Ticappiramana-jeranijine tiadenidsa huemani da inadsapi madija ohuahadeni acco ticamabaqquihijine tipajiramananitohui. Tiadeni naqui ima bicani onihi onihi tinanaridsamananijine Dio tiadeni

tonapajirabaqquihissa tahitohui. ⁹ Madija accora tajaricca imapi Dio Atti dsodo nanidsa ajima napojaro:

—Cappiramanajaridenidsa dade accora tajari.

Ima bicani inanaridsajaropi nema dsanaponitohui

—nani Dio Atti dsodo nanidsa. ¹⁰ Diopa ppa nahi nocco da inajari, ijipanijinecca naco da inajari. Najaro imassa najaropi ticappiramananicca Dio tiadenidsa da inaridsanissa tanitohui. Denima tiadenidsa da inadsapi cappiramanajaridenidsa accoraqquri tiquinanitohui. Tijinedeni pina bono pore nahi huemajarissa nanitohui. ¹¹ Nema tiquinadsapi

Diocca daniji bica tanicca sseqquiri tiquinanitohui. Madija ohuahadenidsa naqui dade accoraqquri tiquinanitohui. Nadsapi ticcadeni da naqquinaja imecote cappiramanajaridenidsa dosse tiquinajaro dsojo inadsa pohuadenidsa da inadsapi pohuadenipa Diodsa huatidsemanahitohui. ¹² Nadsapi Jerosarecca imecotedeni ticcadeni da naqquinaja cajimanadsapa pohuadeni cappiramanahicca mitta quinadsa huatidsemanahitohui. Diodsa naco huatidsemanadsa: —Jehe Abi Dio, tijine bica tani —quinahitohui.

¹³ Imecotedeni acco ticamabaqquimanadsapa Jesocristo tahimari icassiejeranijineccadsa iboraqquri tiquinajarojine ahuato tanijine. Aji pohuadenidsa, madija ohuahadenidsa naqui accoraqquri tiquinadsapi Diodsa huatidsemanadsa: —Jehe Abi Dio, tiana deni tijani, bica tinani —quinahitohui. ¹⁴ Pohuadeni naco tiadenidsa huatideni huanaqquri nadsapa titohuideni Diodsa huati huati quinahitohui. Diopa tiadenidsa pocca tohuati huanehe, pocca biquehe inanajarojine Pohuadsa: —Tijine bica tani —quinahitohui.

¹⁵ Diocca daniji iadsa Pohua Bedi bicabote, deni tojjari. Etti denima bica tanicca huati inanijine ipajira-jerani.

Diodsa etidsedsa: —Jhehe epejena! Ticca daniji iadsa bica tani —inana.

10

Pablopa pajissa Jesocristocca dosseniji cajijari

¹ Ohua Pablo ohuatti bica tadsa tiadenidsa huati onana, ohuattissa tinanamananijine. Aja tiadeni mota ohuadsa ima ponimacca huati huati quinahi omittajaro. Attidenipa: —Pablo ibaccodsa huadsapa inoppine cappina tade. Naraha huaji tanidsa madidsapa pohua atti dacoranicca dsodode cappinera tajari —quinajari ttarana. Nadsapi pina Cristo jone tajari, bica tajarissa onadsa tiadenidsa huati onana: ² Ticcadeni ima ticattemamanapoji, onajaro. Nema tiquinadsapi nidsa tiadenihuaji occapomadsa tiadenidsa ohuadi-jeranitohui. Madija iadsa tatamasso quinajardenidsa huatide ocappina-jerani. Aja attideni: —Pablotenipa pina ajijaro namicca imatohui disseraqquri najaridenissa quinadsa pohuadeni tohuini quinahicca tohuira madimanajari —quiquinanaraha iapi nema inejerani. ³ Iapi pajissa ajijaro namicca madija iquejenani. Naraha aji icahadirejaropi pina ajijaro namicca madijacca jadsiressa nejerani. ⁴ Icca jadsirejinepi pina ajijaro namicca madijaccassa nejerani. Icca jadsirejinepi Diocca dacorehe icajijaro. Najarodsa imasiri tadsajani icahadirejaro. Imasiri dacoranicca pina siba sse nahuajanini dacorajarossa naraha Diocca dacorehejine barariridsehe jicajarossa nanitohui. Diocca dacorehedsa Jesocristodsa jiperaqquri najaridenicca maidsehe inajicanissa tanitohui. ⁵ Madijadenicca deni tojehe naqui inajicanitohui. Madijapa Diocca pajissehe tocahatterahijineraha

pohuadeni deni totonanadedeni ecossamanajaro. Pocca-deni deni tojehe inajicadsapi pohuadeni bodicca huato-hue Cristocca pajissehedsa nattome inahitohui. Nadsapi pohuadeni bodicca huatohue maidsehe tojani ahuato tan-itohui. Bodideni cacajiquimeradsa Cristodsana tohuibo-ramanahijine, onajaro. ⁶ Tiadeni huapima Cristodsa ibo-raqquiri tiquinanissa tanijine imadiccani. Nidsa Cristodsa iboraqquri tiquinanissa tadsapi aja motadeni Cristodsa ibobo tajaripa etti dacoradsa huati icanabaqquihijine in-ajorani. Pina inajidsobaqquijarissa nahitohui.

⁷ Tiadenipi madija huapi qquidera ojarijaro. Madija bodicca ima ssamoqquri tiquinani. Aja madija attipa: —Ohuapi Jesocristocca dodosse ojajaro —nadsapa po-hua bodi huatona: Ia naqui pina pohuassa inajaro, Je-socristocca dodosse tabaqqui iquejenani. ⁸ Aji ohua motta ohuattipi: —Ia Medsede Jesocristopa ohuadsa pocca dossehe denima inanajaro —onanijine jipera onaraha nema onanijine ocappina-gerani. Pajissa Jesocristocca dossehe ocajijaro. Najaro dossehe ohuadsa inanajaropi tiadeni mari ocanabaqquinissa tanijine, ticcadeni jeheniji todacorani nanijine. Ticcadeni jeheniji jicanijine jerani. ⁹ Occa ima teppepi pina tiadeni huajo tonanabaqquini-jinessa naraha najaro tohuini onejerani. ¹⁰ Aja ohuadsa jiperaqquri najarideni attidenipa: —Pablocca marinaja pocca ima teppedsa dsodo inajaropi dacorani. Naraha pohua assire ibacchohuaji huadsapa atti japari tahi. Hu-atide ssamo tahi —quinajari. ¹¹ Naraha attideni nama quinajaridenidsa: Paji, tibodideni huatomananissa taji, onajaro. Nidsa tiadenihuaji jajadsa tibaccodenihuaji idomo huadsapi ohuatti dacoranitohui. Pina huaji tanidsa omadidsa occa ima teppe tiadenidsa dsodo onajarossa nanitohui.

¹² Madija ohuahadenipa poccadeni imadsara huatid-

semanajari. —Iapi bicaquiri inani. Ijine bica tani —quiquinanaraha iapi nema inanijine icappinajaro. Pohuadenipa poccadeni imadsara pohuadeni nattome tan-
 imanajari. Nama quinajarijine poccadeni imapi jidsa
 tajaro. ¹³ Iapi icca ima jerajarods: —Ijine bica tani —in-
 ejerani. Naraha Diodsa idsepe ijinijinepi Pohua ia toca-
 dossebaquijaridsana: —Ijine bica tani —inanijine oppin-
 era tani. Pohua ia tocadossebaquijarijine tiadenihuaji
 bacco inadsa tiadeni mari icanabaquijarode. ¹⁴ Jehe,
 iana tahide tiadenihuaji Jesocristo tahimari icassiejerani-
 jinecca tiadeni maride bacco inapode. Tiadenihuaji
 jaijapo-jeradsapi: —Corintohuaji ijine bica tani —in-
 ejeranitohuiraha. ¹⁵ Madija ohuaha dsepe ijijaridsa et-
 tipi: —Ijine bica tani —inejerani. Pohua dsepe ijihihuaji
 idsepe ijijeradsapi icca ima jerani. Naraha tiadenid-
 sana idsepe ijidsanaponijine jipapa inani. Ticcadeni je-
 heniji napi dsanapodsapi denima tiadenidsa idsepe ijid-
 sanaponijine. ¹⁶ Timadimanani denihuaji Jesocristo tahi-
 mari icassiejeranijinecca maride jaijanijine naqui jipapa
 inani. Naraha mamaride ohuahadeni mari icanabaquiqui-
 manapohuihuaji jaijanijinepi tohuini inejerani. Nani-
 huaji madija ohuahadenijine Dio Atti tojaporaha najaro-
 ds: —Ijine bica tani —inejeranijine.

¹⁷ Nema onajaropi Dio Atti dsodo nanidsa ajima napo-
 jaro: —Madijapa pohuajine bica tadsa: “Ojine bica tani”
 najarana. Pohua atti: “Diojine bica tani” nadsana pohua
 atti Ohuadsa bica tani —nahi nade Dio. ¹⁸ Madija pajissa
 bica tajaripa: —Ohuana bica onani —najarahi. Ia Medsede
 Diona pohuadsa: —Bica tinani —nadsapa pajissa iadsa,
 Diodsa naco bica tajari.

¹ Ohuemecotedeni, ohuattipi tiadenidsa pina obodi tossamojarossa nanitide. Naraha nema nehe ohuadsa tedimana-jeraji. Mohuaradsa ohuatti timittamanaccaji, onajaro. ² Ia Medsederata tinajarimanahijine onadsa Diodine tecconedeni huadi onajaro. Ohuapi pina dsohuatocca abissa onajaro. Tiadenipi pina dsohuatossa tiquinajaro. Cristo tiadeni tocajibacquihijine pohuadsa huati onapojarode: —Corintohuaji quequeriquimana najaridenipa ticca toquejenana —onapode. Nema onajaropi pina dsohuato bica tajaro maqquidejedsa ssamo taccajarossa tiquinajaro Cristodsa tiadeni da onabaqquinijine tohuini onajaro. ³ Jesocristodsa jehe tiquinajaropi bica tade. Pohua ojaridaridsara disseraqqiri tiquinade. Naraha madija ohuaha tiadeni tocamaidsabaqquihi noppine ocappinani. Pina maittaccadsama macca maidsehe nahatojide rabotepa Eba icamaidsajarossa najaroa maidsehecca marinajadsa pajissa tiquinadsapi ticcadeni jeheniji Cristodsa tojaparirana, onajaro. ⁴ Nema onajaropi tiadenidsa marinaja onihi bacco nadsa timittamananijine tohuini tiquinani. Aja Jeso tahimari onihi jidsa tajaro mari mari quinadsa mittade jipaqquiri tiquinajaro. Tocatorime ohuaha pina Dio Corimessa najararaha tiadenidsa tojahijine jehe tiquinajaro. Madija tocassiejerahijine tahimari onihi naqui pina tahide timittamanapojarossa nejeraraha najarodsa pajissa tiquinajaro. ⁵ Najari maidsehe mamaridedenipa: —Iapi Jesocristocca dodosse tabaqqui quejenani —quinaraha pohuadeni attidsa pohuadeni deni tonanamanajari. Naraha ohuapi pohuadenidsa ajimani ojajerani. ⁶ Aji ohuapi ima huatide ssamo onajaro nitide. Naraha obodidsa nahato onani: marinaja pajisaccapi dsori onana-jerani. Najaro marinaja pajissacca nahato onajaropi occa marinaja, occa madiedsa naqui tiadenidsa ahuato onanadsanapojaro.

⁷ Tiadenidsa omadidsapi Jesocristo tahimari icas-siejeranijinecca manaconi jirehe tiadeni mari ocan-abacquide. (Nadsapa motadeni attipa: —A, marinaja manaconi jireheccapi ponima —quiquinanajari. Naraha ohuapi occa tarabaisa onihiccadsana omadijarode.) Nema onadsapi ohua ajimani onanajarossa nadsa Diocca ima bicani ticassiejeranijinecca tiadenidsa tojanijinena odsepe ijjarode. ¿Naraha nema onajaropi tiadenidsa bica tejeraqui? ⁸ Dsama onihicca Jesocristodsa que-queriquimana najaridenicca dsiniro ohuadsa da quina-jarodsa omadijarode. Najaro poccadeni da naqquinaja odijidsajarossa nadsa manaconi jirehe tiadeni maride odsepe ijjarode. ⁹ Tiadenihuaji omadidsa naqui ocappiradsapi: —Ohuadsa da tiquinaji —onejerade. Aja ohueme-cotedeni Masedoniacca bacco quinajaridenina ocappiran-icca ohuadsa da quinajarode. Tiadenidsa occa madie najo tejeranijinepi ticcadeni dsinirotohui huati huati onejer-ade. Jidapana naqui najarossa odsanaponitohui. Dsinirotohui huatira onani. ¹⁰ Aji manaconi jirehe tiadeni maride oजारocca imapi ohuadsa bica tajaro. Najaro imadsa ohohuatidse najaro. Nadsapi dsama arobeni Acaia nemanehedsa occaridsanihuajicca madija occa huatidsehe joma inanamananijine ssamo tani. Pina Jesocristocca pajissehe nahato onajarossa najaro occa huatidsehepi nema dsanaponitohui nahato onajaro. ¹¹ ¿Nejecotohui ohuatti nema onajaro? ¿Tiadenidsa jipera onajaroqui? Nohuerani. Diopa obodi nahato tahi: tiadenidsa jipa onani, titohuideni ohuati huana tajaro.

¹² Nema nehe manaconi jirehe tiadeni mari ocan-abacquinijine onadsapi najarossa onanadsanaponitohui. Nema onanadsapi maidsehe mamaridedenicca ima joma onananitohui. Attidenipa: —Ia naqui madija mari icanabaquijari pina Pablodenissa inajaro

—quinaraha dsinirotohuira mari mari quinajari. ¹³ Pohuadenipa Jesocristocca dodosse tabaqqui pajissacca attidenissa quinadsa tiadeni tocamaidساباqqui-manajari: —Jesocristo ia tocadossebaqqujari —quinaraha maidsamanajari. ¹⁴ Naraha poccadeni maidsehedsa huajo inejerana. Maidsehe jinede Satana naco pohua najidsadsa pina Diocca dodosse memehujicca ssiaja tajarissa nadsa madija icamaidsabaqqui tahi. ¹⁵ Nama nadsapa Satanacca imadsa dsepedeni ijimanajarideni pohuadeni najidsamanadsa pina bicaqquri najarissa quinadsa madija ihicamaidsabaqqui najari. Naraha nidsa dsotodepa poccadeni tabaccorehe manaconi pohuadenidsa najidsohue tojanitohui.

Pablopa Jesocristocca dodosse tojjarijine ocasserehe onihi onihi inahanajaro

¹⁶ Tiadenidsa huati onapomana. Ohuadsa: —Pablopa bodi tossamojari —tiquinejeraji. Naraha tibodideni nema tiquinadsapi epeje. Pina madija bodi tossamojarissa onadsa otahimari bica tajaro denima huati onadsa timittamanaji. ¹⁷ Tiadenidsa otahimari huati onajaropi ia Medsede atti jerani. Ohua otahimarira huati huati onajaropi obodi tossamojarossa najaro nahato onani. ¹⁸ Mamaridedeni huapi taha tiadenidsa huati huati toquinadsa: —Ijine bica tani —quiquinanaraha pohuadenipa pohuadeni tahimarira huati huati totoquina najari. Nadsapi ohua naqui otahimarira huati onana, onajaro. ¹⁹ Tiadenipi nahatojidede tijiraraha madija bodideni tossamomanajaridenicca marinaja mittade jipacquiri tiquinajaro. ²⁰ Poccadeni marinaja mittade jipacquiri tiquinaraha poccadeni tabaccorehe tinahanamanajaro. Pohuadeni attissa tinanamananjine attideni

dacoradsa tiadeni dosse dosse quiquinanaraha manaconi jirehe tidsepedeni ijimanajaro. Tidsepedenitaji, ticcadeni dsiniro inajicamanajaro. Tiadeni tocamaidsa-baqquimanajari. Puhuadeni deni tonanamanadsapa tiadeni ajamani tonanabaqqui-manajari. Tipanodeni huahuacca totonanabaqquimana najari. Naraha poccadeni tabaccorehe tiadenidsa bica tanitide. ²¹ Jaho ocappinajarossa naraha nema nehe huati onana: ¡lapi japariqquri inajaro! Tiadenidsa pina najaridenijinessa inananijine ipajira-jerani. Puhuadenipa: —Ijine bica tani —quinahijine dsiraqquri nadsapa ohua naqui otahimari huatide dsira onana. Pina madija bodi tossamojari huati huati tajarissa onaraha nema nehe huati onana. ²² Ajana, puhuadeni attipa: —Iapi pajissa Isaraeri potemahi jodio madija iquejenani —quinaraha ohua naqui jodio. —Jodiodeni atti ebreo nahatoqquri inani —quinaraha ohua naqui najaro tohuatti ebreopi ohuatti. —Icca idipa Abarahao —quinaraha ohua naqui pocca madija ojani. ²³ —Iapi Jesocristocca dodosse tabaqqui iquejenani —quinaraha ohuana denima. Aji ohuana denima onajaropi pina madija bodi tossamojari huati huati tajarissa onajaro. Puhuadenipa Jesocristodsa dsepedeni ijimanaraha ohuana denima. Toponi cocorodsa naco huedsamanaraha ohuana denima toponi cocorodsa ohuedseje naridsaponi najaro. Cocossi tonahana-manaraha ohuana denima cocossi onahanaridsajarode. Oppinehe onihi, onihijine odsoqquebote naridsade. ²⁴ Jehe, ohuapi najidsohue onahanani huapi tade. Jodiodeni ohuadsa huadiqquri najari attideni: —Pablopa tabaccora tahi —quiquinanadsa ohua cossi quinani 39 nehe onahanapojaro. Dsotode naqui ohua cossi quinani 39 nehe onahanapomade. Dsotode naco nama quinapomade. Huajano ohuahadsa nama, huajano ohuahadsa nama quina-

jaride. ²⁵ Ahuadsa naqui ohua idamanani 3 nade. Sibadsa naqui ohua iquinaquimanani ojaride. Ocasserehe onihi onahanajaro naqui Jeso tahimari mari ocanaridsabaquihijine canoa imenidsa benehi occadsapi canoa imeni je tocanade. Benehi onihidsa occapomadsa naqui canoa imeni je tocanapomade. Dsotode occapomadsa naqui canoa imeni je tocanapomade. Ocasserehe onihi onahanajaropi coridsa imeni nocconidsa je ocanadsa otabodsapi dsome, onassiaja, maji ohuaccapoma nade. ²⁶ Benehi ojani huapi tadsapi oppina tanicca onahanani huapi tade. Hueni ssahaha dacorabote oppinani ohuajaro. Bobotidedenijine oppinani ohuajaro. Occa madijadenijine oppinani ohuajaro. Madija ohuahadenijine naqui oppinani ohuajaro. Odsa pananihuaji naqui oppinani ohuaridsa nade. Odsa nohueranihuaji naqui oppinani ohuade. Coridsa imenidsa naqui oppinani ohuapomade. Jesodsa jehe quinaraha maidsamanajaridenijine ocasserani ohua-dsanapojarode. ²⁷ Tarabadsa imeni ocajidsa naqui onahanade. Tabaccora tanicca onihi, onihi ohuadsa bacco bacco dsanapojarode. Dsome ohuada-gerani naqui huapi tade. Pemi onahana, obacco dsarini onahana naridsade. Ssirini tojadsa naqui ocasserani ohuaridsa najarode. Occa etero ocajicadsa naqui ossirinissa tade.

²⁸ Jehe, ocasserehe huapi tehe onahanaridsaje naraha ima onihihuaji naqui obodi huatoto caneje najaro. Aja Jesocristodsa quequeriquimana najari huapimadenitohui obodi huatoto cadsanapodsapi ¿nejecoma quinahi? ohodsanapo najaro. ²⁹ Madija ojariacca jeheniji tojaparid-sapa ohua naqui obodi tojaparijarossa najaro. Ohuahapa pohua tessejine imasiri inanadsapi ohuadijaro.

³⁰ Ohuapi ohua deni onananijine jipera onani. Naraha nema nehe ocasserani onahanaridsajarocca ima huati huati onaccana, otahimari japari onanicca tiadenidsa

ahuato tanijine. ³¹ Ia Medsede Jesocristo Imehi Diopa omaidsa-jerani nahato tajari. Pohnadsa etidsedsanaponijine bica tani. ³² Aji ohuadsa ima ssonaripojaro tahimarini timittamanadsa japari onani nahatoqquri tiquinanijine. Najaropi maittaccadsama odsa panani Damas-cohuaji omadidsa poccadeni tamine deni tojahi Are-tacca dosseniji dsama cacahuadepa ohua dama quinanijine icadossebaqqijari. Pohnajine otohui odsa panani huapihuaji siba hua nahujaninicca noccobiji huapima ecahuaridsa-mananissa tajarode. ³³ Naraha otessedeni ohua acco icamamanade. Odsa panani siba sse nahujanini memehuajicca noccobiji bedenihuaji ssaji co-huahidsa otessedeni ohua inajimamanadsa ohua tappa icanaronamanade. Nadsapi todsepe ojanitohuiraha dsori onajarode.

12

Dio Pablodsa ahuato inanajaro, Pablo comani inahanajaro

¹ Ohua motta otahimaridsa: —Bica onani, deni ojan —onadsapi Dio ohuadsa: —Jehe, tettipi bica tani —¿nahnajineco? Nohuerahi. Naraha nema nehe ohua Medsede ohuadsa ahuato inanajarocca, ohua tonahattajaricca ima naqui tiadenidsa ohuacomeranijine. ²⁻³ Maittaccadsama huajano jicahi 14 nadsapa Cristodsa jehe najari ojariapa Dio Corimejine pina pocca huadassa naraha pajissa qqui tajari. Dio Corime memehuaji pohua iaccamacossadsapa Dio madihihuaji bacco tajari. Assire iaccamacossajari itide, corime itide, ssamo onani. Naraha Diona nahato tajari. ⁴ Naraha pajissa nahato onajaropi memehuajicca dsama bicanihuaji Dio Corime najari iaccamacossadsapa ima bicani cacomehecca mittajari. Mittaraha najaro ima madijadsa ecomeranijine Dio ecossanissa tajaro. ⁵ Ohuapi pocca ima nahato onajarodsa ohuatidsenipi bica tajaro.

Naraha ohua deni onanadsa ohuatidsenijinepi jipera onani. Ohuapi ajimani. Japari onajarodsana ohuatidsenijine jipa onajaro. ⁶ Naraha occa ima bicani huati huati onadsa naqui ponimacca jerani. Pajissara huati huati onanijineraha joma onajaro. Aji huati onani madija mitamanadsapa: —A, Pablopa nahatojide rajari —quinarana onadsa. Occa madiejine, ohuattijine madija ohua deni inanamananijine jipera onajaro. ⁷ Dio ohuadsa bica tanicca deni tojanicca ahuato inanajarodsana obodi: Jehe, deni ojani onanijineraha nema onejeranijine ocassera tanicca ohuadsa tojajaro. Najaro comanipi ohuassiredsa pina Satanajine atia coba idsanajarissa najaro. ⁸ Najaro comanijine ocasserani onahanadsanapo-jeranijine ohua Medsede Diodsa huati onajaro, huati onapomajaro, huati omanipomajaro naraha tomossi-jerani. ⁹ Naraha ohuadsa ohua Medsede attipa: —Tiadsa ohuati huana tajaro. Ocasserehe tinahananijine tia acco ocamanitohui. Occa dacorehepi madija japari tajaridsana denima ahuato tani —nade ohuadsa. Pohua atti nama nadsapa japari onaraha ohuatidsejaro. Japari onadsa Cristopa ohuadsa pocca dacorehe ahuato inanajaro. ¹⁰ Jehe, japari onadsa, ohua itamassomanadsa, ocappiradsa naqui ohuatidsejaro. Nana-jidso ojadsa, najo tanicca onahanadsa naqui Cristodsa dissera onajarojine onahana-dsanapodsapi ohuatidsejaro. Nema onajaropi mijira onadsa obodina todacorani najaro.

Corintohuaji Jesocristodsa quequeriqquimana najaridenitohui Pablo bodi huatojari

¹¹ Ohua motta occa imara huati huati onadsapi pina madija bodi tossamojarissa onaraha ohuadsa tettideni joma tiquinadsa nema onajaro. Tiadenina otahimari tete-comeramana nanijine occa ima nahatoqquri tiquinaraha.

Aja maidsehe mamaridedenidsana disseraqqiri tiquinajaro. Najaridenipa ohua ajimani inanamanaraha epeje, pina ponimaccassa onajaro. Naraha pohuadenidsa ajimani ojajerani. ¹² Ohuapi pajissa Jesocristo ohua cadossejari tiadenidsa ahuato onanaridsajaro. Aji Diojine ocana-hatori canajaro, aji qqui tiquinapo-jerajarrocca naqui ahuato onajaro. Ocasserehe ohuadsa ssonaridsa naqui mohuaradsa onahanani ahuato tajaropaji. ¹³ Ima ojariena ojine dsori tiquinajaro. Najaroa tiadenidsa dsinirotohui huati huati onejerade. Nema onadsapi pina tiadeni ajimani onanabaqquijarossa najaro. Aja Jesocristodsa quequeriqquimana najari ohuahadenidsapi dsinirotohui huati huati onade. Naraha tiadenidsapi occa madie najo tejeranijine nema onejerade. Naraha ojine tiadenidsa bica tejeradsapi: Epeje, ojine bica tejerani, onajaro.

¹⁴ Tahide tiadeni qquide occani pamade. Jidapana tiadeni qquide occapomanijine onajorani. Nani tiadenihuaji bacco onapomadsa naqui occa madie tiadenidsa najo tejeranijine ohuadsa da tiquinaji onejeranitohui. Ohuapi ticajimananicca tohuini onejerani. Titohuidenina onajaro. Ohuapi pina ticcadeni abissa onajaro. Ejedeni imehideni cappiramanahicca mitta mitta quinarahi. Imehidenina bedideni cappiramanahicca mitta mitta quinarahi. ¹⁵ Nadsapi ohua ocajijarrocca nemanehede tiadenidsa dade jipa onani. Tiadenidsa ima bicani tojanijine ohuassire naqui tiadenidsa ohuaccorajaro. Tiadenidsa accora onaraha ticcadeni ima ohuadsa jidsa tajararo. Ohuapi titohuideni denima ohuati huana dsanaporaha tiadenina ohuadsa tetideni tohuanerajonajaro.

¹⁶ Occa madie tiadenidsa najora tanijine ticcadeni dsinirodsa omadi-jerani nahatoqqiri tiquinaraha ohuadsa tiadeni mota attidenipa: —Pablopa maidsade nahato tajari. Ia tocamaidسابаqquihissa tajari

—quinajari. ¹⁷ Naraha ¿nejecora tiadenidsa onanadsa tiadeni ocamaidsabaquijarotte? ¿Tiadenihuaji dosse onabaquijari ojaría ticcadeni dsinirotohui tiadeni tocamaiidsabaquijari ttarana? ¡Nohuerahil!
¹⁸ Aja huajano toccapjaridsa Titona tiadeni qquide toccahijine pohuadsa huati onadsa toccade. Pohuadsa imecote ohuaha naco dosse onajaride. ¿Naraha Titopa dsinirotohui tiadenidsa maidsajari ttarana? ¡Nohuerahil! Pohuapa pina ohuassa najari. Pohua bodi tohuini nahiccapa pina ohua obodi tohuini onaniccassa najaro. Ohua, Tito tedsejepi Jesocristocca marinajassa inanadsa imadijaro. Najarossa icanirejaro.

¹⁹ Aji icca ima huati huati onajaropi tiadenidsa: — Icca ima dsori tejerani, tossamo-jerani — inanijine jerani. Ia Jesocristocca dodosse iquejenajaropi tiadenidsa ima bicani tojanijinera huati huati inajaro. Dio etti mit-tahi nahatoqquri inajaro. Ohuemecotedeni, tiadenidsa ohuati huana tani. Idsepe ijie huapimapi Jesocristodsa jehe tiquinajaro todacorani nanijine. ²⁰ Titohuideni obodi huatojaro: ¿Tiadeni qquide occapomadsapi ticcadeni ima nejecoma napadseje? ohonanajaro. Ticcadeni ima bica tadsa nani bacco onanijine tohuini onani. Tiadeni naqui ticcadeni imadsa ohuatidsenijine tohuini tiquinani. Naraha ticcadeni ima bica tejeranicca noppinenina ocappinajaro. Ticahadirere canadsa timadimananitide. Madija cajjaricca acconi tetedimana nanitide. Amadsati tedimanadsa ahuaui johua, ahuaui johua tiquinanitide. Accoqquri tiquinadsa timadimananitide. Najaro noppineni ocappinajaro. Titessedenidsa tatamasso tiquinanitide. Ponimacca ima huatijidede tijiranitide. —Ohuana deni ojani, bica onani —titi-quinana nanitide. Tiqueriquimanadsa ahuaui johua, ahuaui johua tiquinadsa ticcadeni ima toccanissa tejeran-

itide. Nema tinanamanadsapi ohuatidse-jeranitohui. Tiadeni naqui tiadeni huati ocanabaquidsa ohuadsa tetidsemana-jeranitohui. ²¹ Jehe, nanihuaji bacco onanipomadsapi ticcadeni imajine Dio tedsejema ocomehi nani noppineni ocappinajaro. ¿Ticcadeni imajine oji oji odsanapopadseje? onajaro. Aji tiadeni mota huapi taha tahidedsama imasirima madimanajonajaria jidapana naco nebomana-jarahitide. Puhuadenipa tabaccorehe oppina tanicca tonanade disseraquiri naccahitide. Huananehe huapima ihinanaridsamana naccanitide. Ima tabaccora tanicca tonanade disseraquiri naccahitide, onadsa ocappinajaro.

13

Pablocca ima nattome quinaraha pahuadenidsa: —Tiadeni tiadenira nattome tinanimanaji —najari

¹ Tahide tiadeni qquide occani pamade. Jidapana tiadeni qquide occapomanijine onajorani. Nani tiadenihuaji bacco onapomadsapi ticcadeni ima cattemade onajo-jeranitohui. Tetideni ajimamana-jeraji: Madija ima tonanadsapa pahuadeni noccodsa qqui toquina-jarideni ima cacattemededsa huati toquinahi bica tani. Madija pamaha, 3 quinaha naco huati toquinadsa pajirani. ² Nadsapi tahide ima ticajimanapojarodeni, aji tiadeni huapimadsa naqui ohuatti timittamananissa taji, onajaro. Huajano toccapojaridsa tiadeni qquide occadsapi ticcadeni imasiri tinebomananijine tiadeni huati ocanabaquide. Jidapana huaji tanidsa omadidsa naqui ohuatti nema onapomajaro: ¡Imasiri tinebomanaji! Tinebomana-jeradsa bacco onapomadsapi ticcadeni imasiri mohuaradsa onahana-jeranitohui. Ohuatti dacoradsa tiadeni huati ocanabaquipomanitohui.

³ Nema onajaropi occa ima nattome tiquinadsa: —¿Pabloa pajissa Cristo atti huati huati tajarico? —titi-quinina najaro. Naraha Jesocristopa dacorajari. Ticcadeni imasiri manaconi tiadeni tonajidso-baqquihijine japari tajarajari. Pocca dacorehe tiadenidsa ahuato inananitohui. ⁴ Pohnuapa pina japari tajarissa nadsa ahua porimacossanidsa dsoqquejari. Naraha Dio pocca dacorehe pohnuadsa inanadsapi nahatonidsa camitta taha madijari. Ia naqui najarossa inajaro. Jesocristocca japarie icajiraha pocca iquejenadsapi Diocca dacorehe icajini. Najaro dacorehema tiadeni acco camade imadijaro.

⁵ Tibodideni huatonissa taji. ¿Ticcadeni jeheniji dacoraqui? Jari, tiadeni nattome tinanimanaji. —¿Pajissa Jesocristo ohuadsa madico? —tiquinaji. Jesocristo tiadenidsa madi-jaradsapa ticcadeni jeheniji dsori tac-cani. ⁶ Icca ima nattome tiquinadsa naqui dsori inanani qqui tiquinejeranitohui. Pajissa Jesocristo iadsa madihi tiadenidsa ahuato tanijine nahato onajaro. ⁷ Diodsa huatide iquejenadsapi: —Abi Dio, imecotedeni Corintocca tabaccorehe inanamana-jeranijine bodideni acco ticamabaqquina —ihinanajaro. Najaro icca huatinajapi icca marinaja tossamoni noppineni icappinadsa jerani. Pajissa ticcadeni madie pajiranissa tanijine tohuini inadsa Diodsa huati huati inajaro. Aji tiadeni mari icanabaqquijaro pina dsori tajarossa nanitide naraha epeje, nema nehe, inajaro. ⁸ Diocca pajissehedsa ima inananijine ipajira-jerani. Diocca pajissehema timadimananijine tiadeni acco icamabaqquinijinena bica tani. ⁹ Nadsapi japariqquri inaraha etidsejaro. Jesocristodsa ticcadeni jeheniji todacorani nanijinena tohuini inajaro. Titohuideni Diodsa huati huati inajaropi ticcadeni ima Diodsa pajiranissa tanijine. ¹⁰ Najarojine aji timadimananihuaji occapoma-jeraccadsa occa ima teppe tiadenidsa dsodo

onajaro, nani bacco onejeraccadsama ticcadeni ima ticattemamanaponijine. Nadsapi nani bacco onadsa ohuatti dacoradsa tiadeni huati ocanabaqqui-jeranitohui. Ia Medsede pocca dossehe ohuadsa inanajaropi ticcadeni jeheniji todacorani nanijine. Ticcadeni jeheniji jicanijine jerani.

Pablocca ima jicanicca

¹¹ Jehe ohuemecotedeni Jesocristodsa jehe tiquinajaro, ajjaropi occa ima jicanicca. Diodsara tetetidsemana naji, onajaro. Ticcadeni ima ticattemamanaji, ticcadeni madie tobicanijine. Tibodideni acco acco ticanana. Timecotedeni tedseje jehe ticanirenissa taji. Ticajonerara canadsa timadimananissa taji. Nema tiquinadsapi Dio tiadenidsa madihitohui. Diopa tohuati huanehe jinede, jonehe jinede.

¹² Nani timadimananihuaji timecotedeni tedseje bacco ticaniredsapi nija tiquinadsa dama, ticahuajacossa titiquina naji, onajaro. Aji omadinicca imecotedeni naco huapima tiadenidsa nija quinajari.

¹³ Ia Medsede Jesocristopa tiadenidsa ima bicani inanana, onajaro. Diocca tohuati huanehe naqui tiadenidsa tojadsanapona. Pohua Corime tibodidenidsa madi-dsanapona, onajaro. Epejeni.

El Nuevo Testamento en el idioma Culina (mádija) del
Perú

Kulina: El Nuevo Testamento en el idioma Culina (mádija) del Perú
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 30 Nov
2021

4c7c82dd-1f0f-5341-b6e6-26970c27fee2